



## PEPA TUSITUSIA MO LE AUFA'ASALALAU

Apia, 9 Iulai 2020 – *Talatalaina o manatu lē faavaea ma faamatalaga/tulaga sa'o e uiga i sauaga tau feusuaiga.*

O se aoaoga faa Tusi Paia na faalauiloa faalauaitete i luga o le Facebook i le aso Tofi Iulai 2020, ua mapuna ane ai le faaalua o manatu ma lagona eseese i luga o upega tafailagi e uiga i sauaga tau feusuaiga.

E iai le manatu o le Ofisa o le Komesina o Sulufaiga e fia tali atu i nisi o mataupu alia'e, ona e faiā tele i atugaluga ogaoga o loo taulai iai le Ofisa ma le Malō (e ala atu i le Matagaluega o Tina ma Tamaitai, Atinae o Nuu ma Afioaga ma Aga Fesootai) i tausaga e le i mamao atu. O le tausaga e 2017 na faatinoina ai e le Ofisa o le Komesina o Sulufaiga se Sailiiliga Lautele i Sauaga I Totonu o Aiga i Samoa. Ao lei faatinoina lena suesuega, na faatinoina ai e le Matagaluega o Tina ma Tamaitai se suesuega mo le Saogalemu o Aiga 2017.

O se tasi o mataupu na aofia i lenei vasega faa Tusi Paia, o le aoaoga lea a lesu o loo i le Mataio 5:28 e uiga i lagona mulilua a se tamaloa pe a vaavaai i se tamaitai ma faananau iai. O se faamatalaga manino i lenei aoaoga o loo faamatalaina ai le natura o le tamaloa/tama, e tali atu ai i foliga vaaia o se tamaitai. O lenei manatu, o loo faamatalaina e faapea: ua foi mai le tamaloa mai le maumaga ua maea galuega o le aso ae tau mai i se tamaitai "e le o fetai/lelei ona laei o fai" (koe a papa oga maso i gei ofu e fai) i le auala. E tusa ai ma lea tulaga, o le a avea le tamaloa o le tagata leaga ma tuuai i le mea e mautinoa lava o le a tupu. A tuu le isi itu, e tele lava na leai se mea e fai i gaioiga a le tamaitai, e tusa ai ma le lē talafeagai o le taimi sa iai i lea nofoaga ma ituaiga lavalava o loo ia ofuina.

O loo manino lava le 'auga o le faasoaga a Patele, o le fautua atu lea i tamaitai o lana vasega i ituaiga lavalava e talafeagai. Sa ia talanoa faalauaitete i le mataupu lenei e uiga i isi ituaiga siosiomaga e ese mai le faamatalaga e pei ona tuuina atu i luga. O loo ia faitioina ituaiga lavalava o loo ia vaaia o loo laei atu e tamaitai i le lotu.

O sauaga tau feusuaiga, o se mataupu e matua lata mai iai tatou i Samoa. O se faafitauli ua faatuputeleina ma e lē faapea e mafua mai ona o le sese o le taimi ma le nofoaga e maua atu iai lē ua aafia. O loo aafia lava i latou nei i nofoaga e tataua ona latou maua ai le saogalemu. O le Lipoti o le Sailiiliga Lautele i Sauaga i Totonu o Aiga, o loo lipotia ai e 20% o tamaitai e aafia i feusuaiga fai faamalosi ma le 10% o loo lipotia e faafeusuai faamalosi lava e tagata o ō latou lava aiga.

I mataupu i sauaga tau feusuaiga e faasaga i tamaiti ma tamaitai laiti, e toatele lava e afaina mai i totonu o ō latou lava aiga. O se tasi lenei o sauaga matuiā e faasaga i tamaiti. E toeititi leai se aso e leai ai se lipoti o sauaga tau feusuaiga e faatino i tamaitai laiti e faia e tagata e latou te iloa.

E tatau ona matuā manino ma nofo malamalama lelei tatou, o le tuuaiga mo le faatinoina o nei amioga matagā, e patino tonu lava ia i latou na faatinoina le solitulafono **ae e lē tatau lava** ona tuuaina fua i latou ua afaina ona o nei solitulafono. E leai lava se tamaitai poo se tamaititi e manao e sauaina o ia e ala i feusuaiga ma o le a faaleagaina ma faaumiumi aafiaga o le mafaufau ma le tino ona o nei sauaga. I le tele o taimi, o le a tuuaia e le tagata lava ia, maasiai ma lagona le salamo i le mea ua tupu.

E lē mafai e se tamaititi ona tuuina atu se maliega e faatino ai sauaga tau feusuaiga ma e le mafai foi ona tuuaia o ia i ni gaioga tau feusuaiga e faatino iate ia. E pa'ū tonu lava le tuuaiga i lē na sauaina le tamaititi ma isi foi o loo faatinoina sauaga e faasaga i tamaitai. E le tatau ona iai se uiga lē mautonu i faatinoga e faasaga i nei amioga matagā pe afai o loo tatou mananao ina ia agai i luma tauiviga ma lenei mataupu ua lē mafa'atusalia lona faatupulaia e pei ona tatou molimauina le tupu pea i lo tatou siosiomaga. O le tuuaia o lē na aafia i soo se faatinoga, o le a maua ai le avanoa e sola ese ai lē na faatinoina le solitulafono.

A lē faamalosi le lē tatau ona faatinoina o sauaga tau feusuaiga, ma tatou manatu ane o loo iai foi se vaega a i latou o loo aafia i le faia o nei uiga ma e tatau foi ona faitiaina i latou i lavalava latou te ofuina atoa ma nofoaga o loo latou o iai, e tatau ona tatou fesiligia poo a aoaoga o loo tatou aoaoina ai a tatou fanau, aemaise lava i fanau tama. O tatou aoaoina i latou o le ofuina e tamaitai o ofu e lē talafeagai o se auala lea e faatagaina ai ona latou faia iai ni feusuaiga fai faamalosi iai i latou? O tatou aoaoina i latou o soo se tamaitai e fealuai i le leva o le po e tatau ona faia iai ni feusuaiga fai faamalosi?

Mo le silafia ma le aoaoina o tagata lautele, ua faasoa atu ai e le Ofisa nisi o faamatalaga/tulaga sa'o ma taua e uiga i sauaga tau feusuaiga atoa ai ma nisi o manatu le faavaea.

O sauaga tau feusuaiga o se faatinoga lea o feusuaiga e aunoa ma le tuuina mai o se maliega.

O lou lē tuuina atu o se maliega o lona uiga o lou lē faatagaina lea o se gaioga ina ia faataunuaina, i se auala manino (e ala i lou faiatu 'leai') poo gaioga (e ala i gaioga a lou tino o loo tau atu ai ete le o manaomia lea tulaga)

O **sauaga tau feusuiga o se solitulafono** ma e tatau ona lipotia i Leoleo.

**Manatu lē faavaea 1: O ituaiga ofu o loo ofuina, o le tafao i le leva o le po poo le inu ava malosi foi o lona uiga o loo e ioe atu i sauaga tau feusuaiga.**

**Faamatalaga/Tulaga Sa'o:** O lavalava o loo ofuina, o ava malosi o loo inuina ma

nofoaga o loo latou iai, e le o se itu lea e faailoa mai ai o loo latou fia faatinoina ni feusuaiga ma se isi tagata. O le maliega e faatino se feusuaiga e tatau ona talanoa tuusao mai e le tagata. O le nofoaga o loo e iai poo ituaiga lavalava o loo e ofuina, e lē o se valaaulia e faia ai ni feusiaiga faamalosi I soo se taimi.

E matuā tuuaia lē na faatinoina le solitulafono i ana gaoiga na faatinoina. O loo aafia lava tina/tamaitai i sauaga tau feusuaiga e oo lava i atunuu i Sasa'e Tutotonu (ft tagata Alapi) o loo faamalosi ai le ufiufi atoa o tino o tamaitai. O lenei manatu le faavaea e faaseseina ai le tulaga sa'o e ala lea i le aveese mai o le tuuaiga mai le na faatinoina le solitulafono ae tuuaia ai le tagata o loo aafia.

**Manatu lē faavaea 2: O le tele o sauaga tau fesusuiga o loo faatinoina e tagata e leai se sootaga**

**Faamatalaga/Tulaga Sa'o:** O le tele o sauaga tau feusuaiga o loo tutupu nei, e faatinoina lava e tagata e iloa lelei e lē o loo aafia. O nisi o loo faia lenei solitulafono, o nisi e iloa lelei e lē o loo aafia ma atonu o se tagata sa ia faatuatuaina foi. O le tele lava o sauaga tau feusuaiga, o loo faatinoina e nisi e iloa lelei e lē o loo aafia e aofia ai paaga, uo, paaga i le galuega poo tagata o aiga.

E fia faailoa e le Ofisa o le Komesina o Sulufaiga galuega tuu faatasi a Matagaluega ma Ofisa o le Malo ma nisi o paaga i lenei lava mataupu tau sauaga e aofia ai sauaga tau feusuaiga. E fia faamalo i le agaga o le galulue faatasi ina ia tafi esea ma faailoa amioga ma manatu lē faavaea o loo tafuina ma faaola atili ai ituaiga o sauaga esee i totonu o le atunuu. O loo maualuga le vaavaai atu a le Ofisa nei iai latou e mafai ona faia se suiga e ala i upu ma aoaoga e taua ma iai se aogā mo olaga o fanau laiti. O se tasi o fautuaga i totonu o Lipoti e lua e pei ona taua i luga, o loo augani atu ai i Ekalesia ina ia fesoasoani e taofia amioga ma manatu le faavaea o loo sasao nei i totonu o le atunuu o loo mafua ai sauaga i totonu o aiga; ma ia ave a nisi e taimua i le taofia o sauaga i totonu o aiga.

E fautuaina e le Ofisa i latou o loo aafia i sauaga faamalosi ma sauaga tau feusuaiga ina ia faafesootai le Ofisa o Leoleo i le telefoni 22222 poo le Toomaga mo e Puapuagatia i le numera vili fua 800-7874.